

欽定大清會典事例

卷七十八至八十

吏部  
處分例

欽定大清會典事例卷七十八

吏部

處分例 京察統例 京堂京察

京察統例○

國初定內外官三年考滿。視其稱職與否而黜陟之。○天聰八年。初次舉行。令各部院衙門官所。有過犯。備開考覈。○崇德二年定。各官辦事勤敏。稱職而無過犯者。准加授官爵。○八年定。各官辦事勤慎。考註一等二等者。雖有小過。亦准加授官爵。○順治初年定。京官考察。六年舉行。

一次。○四年定。各官於考滿前。或已升授官爵者。今遇考覈。俱不准重加官爵。怠惰庸劣者革職。○八年議准。欽天監。太常寺。太醫院官。九年考滿。有缺升任。無缺升俸二級。○九年題准。在內四品。在外布政使以下各官。俸滿三年。移送吏部。都察院考覈。分為稱職。平常。不稱職。三等具題。○又題准。督撫。照在京官員考滿。○十二年題准。凡在京所丞。大使。副使。司獄。雜職等官。考滿。照例考覈。註冊不具題。○十三年議准。考滿稱職者。給予

誥敕。○又題准。凡京察三品以上京官。及在外督撫。具疏詳開履歷。及有無過犯。據實自行陳奏。取自

欽定。其出征奉差。丁憂告病養親。給假者。俟回任之日。自陳。○又議。准在京各衙門屬官考察。不論現任升遷。公差。丁憂告病養親。給假降調。及行查未結者。俱聽本衙門堂官考覈。照外官考察格式。填註考語。事蹟。或賢或否。應去應留。造冊密送吏部。都察院。吏科。河南道。以憑會考。如將應考官員遺漏。

將不應考官員造入冊內者。聽部院糾叅。○又議准。官員六年升調不一。若會同參註。反開推諉遺漏之端。應專責現任考察。○又題准。各部院衙門筆帖式。照有職掌官員例。一體考察。○又題准。吏部。都察院。吏科。河南道。封門閱冊。公同磨對。過堂考察畢。各衙門掌印官。俱赴吏部面議。後即行具題。○又議准。凡遇京察時。大小各官。俱暫停升轉。俟事畢出榜後。照常舉行。○又議准。吏部封門後。科鈔中有應處分各官。亦俟京察事畢查議。○又題准。凡京察處分。年老

有疾者致仕。貪酷者革職。罷軟無為。素行不謹者。給予頂戴閒住。滿洲人員罷軟不謹者。革退衙門。浮躁淺露。才力不及者。降一級調用。○又題准六科京察。吏科都給事中。將六科各官行過事蹟。開列冊內。不註考語。彙送部院考察。○十四年議准。考滿賞賚。部院衙門一品堂官。賜羊酒。表裏各四疋。二品堂官。賜羊酒。表裏各三疋。三品堂官。賜表裏各二疋。○十八年議准。滿洲三品郎中。原係自陳。今令該堂官考覈。滿洲六品以下官。原未考滿。今俱准考滿。○康熙元

年題准。僉都御史。四品正卿。國子監祭酒。六科

都給事中。

五年改為掌印。

及中書科。行人司。上林苑監

等衙門掌印官。咨送部院考覈。其餘官員。俱由

各衙門堂官及掌印官註考。移送部院。○又議

准。部院官升轉。食俸相同者。俱准通理。○又題

准。凡京察貪酷者。革職拏問。罷軟無為。素行不

謹者。革職為民。浮躁淺露。才力不及者。降一級

調用。○又議准。

盛京侍郎京察。照例自陳。○又議准。京官四品外

官布政使以下。考滿分為五等。辦事一等稱職。

者。紀錄一次。若此後緣事議處。准其抵銷降一級。辦事二等稱職者。止加賞賚。平常者。照舊供職。不及者。降一級調用。不稱職者。革職。○又定各官遇有升缺。俱照考滿等第升轉。○又題准六科左右給事中。並給事中考察。俱聽都給事中填註考語。○三年議准。考滿二等稱職者。改註勤職。○又

諭

內外官俱於康熙三年起。每三年彙考一次。其到任

未及三月者不與。○又議准三品以上官。雖經升調

食俸相同。俱通理前俸考滿。○又議准筆帖式



與有職掌官員一體考滿。由各衙門堂官填註考語。分為稱職、平常、不稱職三等。移送吏部、都察院覆考。註冊不具題。○又議准各旗京察。以才能咨送補授部院衙門官員。未及半年者。由原任衙門註考。○又題准各官考滿一等、二等者賞賚。在內四品、五品官。在外巡撫及布政使四品以下官。賜表裏各一疋。在內六品以下。在外五品以下官。賜表一疋。○又題准筆帖式考滿。亦照有職掌官員例。分為稱職、勤職、平常、才力不及、不稱職。凡五等。其考註優等者。照例先

用。有不及者。無級可降。即行黜革。○又議准。欽天監等衙門官。九年內。考滿三次。俱一等者。將二次考滿。各紀錄一次。給表緞。其第三次考滿。升俸一級。仍給表緞。○三年議准。筆帖式考滿。賞賚。與有職掌官同。○又議准。筆帖式考註一等。稱職。二等。勤職者。照例開其實蹟。保舉賢能。註冊。○又議准。尚書。左都御史。轉大學士。及各部院尚書。左都御史。互相轉補。各部院侍郎。互相轉補。並通政使。大理寺卿。宗人府。府丞。轉副都御史。考滿。俱通算前俸。若學士。副都御史。通

政使大理寺卿宗人府府丞升侍郎俱不算前  
俸學士副都御史等官授巡撫巡撫升總督亦  
不算前俸○又題准考滿官員應將所辨職掌  
及何事奉

旨改正何事駁回何事議處詳明開載考註一等二  
等者在內由該衙門堂官六科都給事中在外  
由督撫保舉賢能具題○又題准京官考滿一  
人一疏彙齊具題外官考滿各直省將所屬一  
等者一疏二等者一疏平常者一疏不及者一  
疏不稱職者一疏亦彙齊具題下部院衙門覆

考。○又議准內外官未經考滿升職者。於新任  
內考滿。○又議准僉都御史。令其自行陳奏中  
書舍人專管

誥敕。聽內院考覈。○又議准各官已經升補。俱不算  
前俸考滿。○四年。停止考滿。止行京察。○六年  
題准。凡京察才力不及有疾者。降一級休致。老  
病者。原品休致。○九年。題准才力不及者。降二  
級調用。浮躁者。降三級調用。雖有加級。不得抵  
銷。止准帶於所補新任。○十一年。議准京察文  
冊。各照八法。今改六法。填註考語。○十二年。題准六

科京察不分掌印給事中與給事中俱將行過  
事蹟開列冊內不註考語由吏科移送部院考  
察○十八年題准升轉降補各官到任半年者  
於新任衙門註考未及半年者於原任衙門註  
考○二十四年停止京察○雍正元年

諭在京部院衙門官員三年考察一次係好事應行查  
例議奏欽此遵

旨議定舊例六年京察為期甚遠今遵

旨三年考察一次○又議定在京三品以上滿漢官員

在外督撫

盛京五部侍郎奉天府府尹均將三年內行過事蹟過愆據實自陳○又議定在京部院等衙門所屬官員於雍正四年三月內該堂官填註考語造冊密送吏部都察院吏科河南道俟文冊到齊吏部請

旨另派大學士大臣會同都察院吏科河南道詳加考察分別去留○四年

諭嗣後遇京察之年著內閣滿漢大學士吏部都察院吏科河南道公同閱看著為例不必另派大臣○又諭嗣後凡降罰之案奉旨特免者不必載入自陳本中

著吏兵二部一例遵行。○又題准在京大小各官。遇京察時。自二月二十五日起。暫停升轉。俟事畢出榜後。照常升補。凡科鈔文中。有應行議處各官。亦俟事畢查議。至現在奉

旨升調官員。仍行遷轉。察議官員。仍行察議。○又題准各衙門滿漢堂官。有一員。歷任已久者。仍令本衙門填註考語。其滿漢堂官。俱經升轉。新任堂官。俱到任未久者。應令升任堂官。會同填註。如原任堂官。俱升外任。或已經解任。其考語。俱令新任堂官填註。○又題准嗣後六科滿漢官員

京察不分掌印給事中並給事中俱令將行過事實開列冊內送都察院堂官填註考語移送吏部會同考察○乾隆十七年

諭京察之年部院堂官各省督撫循例自陳求斥罷候旨照舊供職此雖三載考績之義但卿貳職贊機務督撫任寄封疆朕量材簡擢日復於懷其有不副委任或克稱簡畀者率已隨時黜陟斷無遠待三年之理凡可俟至京察解退者不過閒曹冷署年力衰昏而又非有大過介於可去可留之間者耳且身列大臣謬以斥罷為辭是相率為偽誠無謂也嗣自今內



而部院司官外而道府。京察大計之例。仍舉行以昭激勸。其自陳繁文著停止。以示崇實。○二十一年

諭。何國宗職司風憲。乃於京察大典。竟將伊親弟列為一等。雖古有內舉不避親之語。然有祁奚之公。則可試問何國宗兄弟。能無愧祁奚所言否乎。此所關繫於官常者甚大。不得不示以懲儆。朕用人行政。毫無成見。賞罰予奪。一秉至公。期於各當。將此宣諭中外知之。○二十四年

諭。向來內外文武三品以上大員。遇京察軍政之年。援例自陳。文具相沿。無裨實政。曾經降旨停罷。第念伊